

Submisaun Luta Hamutuk

“Orçamento Rectificativo do Orçamento Geral do Estado 2010”

Bazeia ba Proposta de Lei kona-ba Orsamento Rectificativo (OR) 2010 nebe governo haruka ona ba Parlamento Nasional iha dia 01 de Junho 2010 hodi husu aumentu total despeza hamutuk **\$177,985** milhoes de dollar Americanos (aumenta 27%), ami hakarak hato'o Luta Hamutuk nia opiniaun ba proposta lei ne'e. Proposta orsamento rectificativo ne'e hatudu deit: (1) esplikasaun macro-economia deit no laiha esplikasaun detalhes impaktu dereitamente (micro-economia) husi alokasaun hodi justifika katak montante osan hira mak comunidade sira atu hetan; (2) dokumentus Orsamento Rectificativu nebe mak governo apresenta komplikadu liu, tamba laiha esplikasaun espesifiku kona-ba utilizasaun osan nomos laiha esplikasaun relasiona objetivo mak atu atinzi; no (3) transferensia Fundo Petroliferu (FP) husi Rendimento Sustentavel Estimado (RSE 3%) nebe mak governo apresenta laiha esplikasaun kona-ba futuro rendimentu husi Kitan nian nebe mak iha 21 de Maio 2010 governo (SERN-ANP) halo ona lansamento.

1. Cresimento Economia

Cresimento economia 8.4% iha 2007 no sae ba 12.8% iha tinan 2008 nomos eziste nafatin ho digit rua (12.2%) iha 2009 tuir lolos tamba reseitas husi minarai sae makaas nebe mak tama iha konta Fundo Petrolifero nian. Laos tamba investimento publicos ba area enerjia eletrica, saude, edukasaun, habitasaun social no capital humano nomos espansaun iha seitor privado nebe governo apresenta. Estimativas preliminares Governu katak, cresimento economia sei mantein iha digit 2 (rua) tamba espera mos kontribusaun husi seitor agricola no seitor privada mak hanesan seitor telecommunikasaun no transportes. *Estimativas preliminares ida ne'e karik bele akontese, maibe kestaun mak cresimentu economia iha digit 2 (rua) nebe mak diak tuir lolos tenke iha ona estimativas nebe klaru kona-ba indikadoriu cresimento de populasaun nomos politika distribusaun renda das pessoas iha Timor Leste.*

Ano	2007	2008	2009	2010 pro.	2011 pro.
Produção mundial	5.2	3	-0.6	4.2	4.3
Países Avançadas	2.8	0.5	-3.2	2.3	2.4
Países em Desenvolvimento	8.3	6.1	2.4	6.3	6.5
Timor-Leste	8.4	12.8	12.2	10.4	7.7

Hare'e ba numeru cresimentu economia nebe mak as teb-tebes (estimativas iha 2010 bele to'o 10.4%) kompara ho nasaun avansadu no dezenvolvimento sira hatudu katak, mudansa economia nasional iha nível asegurado nia laran. Maibe la-signifika katak cresimento economia ho digit rua bele fo impaktu rendas das pessoas povu Timor nebe diak liu kompara ho países seluk.

Maibe tuir ami nia hare'e katak, tabela cresimento economia nebe mak governo apresenta seidak hatudu mudansa signifikadu kona-ba mudansa moris povu nian ba iha investmentus públicos iha tinan tolu nia laran. Ezemplo balun husi Luta Hamutuk nia monitoramentu hatudu katak, povu seidak iha kbi'it ba hodi asesu ba iha merkadoria. Governo seidak iha dadus konkritu no apropriadu kona-ba produsaun povu iha merkadoria nomos nível rendas das pessoas sei menus husi \$1 de dólar Americanos kada loron ida (Fontes: *The Millenium Development Goals of*

Timor Leste, 2009) ne'e sei la fo kapasidade nato'on ba populasaun hodi asesu ba iha merkadoria.

Neduni, Luta Hamutuk hakarak hateten katak komparasaun cresimento economia ho paisés seluk hanesan *artificial* deit ka *pembohongan publik*, katak numeru hatudu iha cresimento economia maibe iha realidade tuir lolos laiha.

2. Inflasaun

Hare'e ba proposta orsamentu rectificativu, hatudu katak inflasaun iha Timor Leste laiha variabel ida hodi sukat inflasaun. Estimativa annual nebe mak Governu halo kona-ba inflasaun sei la fo impaktu positivu ba kapasidade kompras ba povu, tamba mudansa presu ka aumenta presu nebe akontese iha rai laran. Inflasaun akontese tamba laiha equilibrasaun fornese metu materiais ka beins e servisu nomos sirkulasaun osan iha Timor Leste. Fornesimento materiais ka beins e servisu iha Timor Leste bele diak maibe inflasaun ba povu Timor bele akontese tamba sirkulasaun osan barak demais maibe laos iha Timor-oan nia liman. Nune Luta Hamutuk nia hare'e katak, estimativu annual kona-ba inflasaun konsidera invalidu.

Parte seluk, inflasaun bele akontese tamba Governu injekta osan barak maibe imprezario sira mak sai hanesan kliente Governu nian. Imprezario sira lori osan Governu nian hodi halo importasaun materiais nebe fo impaktu ba mudansa presu iha merkado rai laran. Nune Governu presiza politika ida diak bainhira halo alokasaun orsamentu nebe bele fo kbi'it ba povu no prevene importasaun materiais makaas nebe mak mai husi rai liur.

Reseitas

Luta Hamutuk hare'e katak, proposta Orsamento Rectificativo tuir lolos hodi selu alterasaun iha tesouro ho montante hamutuk minus (-) \$67,7 milhoes dollar Americanos. Nebe OR hamutuk **\$838** milhoes de dollar Americanos ida ne'e, hodi selu mos \$67,7 milhoes de dollar Americanos ba alterasun iha tesouro nebe minus 8.1%. Tabela kraik bele hatudu:

Kategoria Reseitas	Inisio OGE 2010	OR	%
1 Fundo Petroliferu	502	811	96.8
2 Imposto Domestiku	76,7	81,7	9.7
3 Orgaun Autonomus	10,5	13	1.6
4 Alterasaun Tesouro	70,6	-67,7	-8.1
Totalidade (US\$ milhoes)	659.8	838.0	100

Fontes: OGE 2010 no Tabela Financeiro OR 2010.

OGE inisiu 2010 hamutuk **\$659,996** milhoes de dollar Americanos nebe aprova iha fim de ano 2009, ami hanoin katak orsamento ne'e sei viavel nomos sei demenui despeza estado iha tinan 2010 nia laran. Tambasa mak foti osan bar-barak tan hodi deminui deit alterasaun tesouro nian?

Tamba-ne'e, ami husu ba Parlamento Nasional hodi fo atensaun makaas ba iha Saldo Teseoru nebe minus iha proposta rectificativo nebe mak apresenta mai husi governo. Nune mos governo tenke apresenta detalhes saldo tesouro nebe mak minus, halo ba saida nomos tenke esplika uzu saldo tesouro inisiu 2010 hamutuk \$70.6 milhoes de dolar Americanos.


Despeza

Bainhira Luta Hamutuk halo komparasaun orsamento inisiu no mudansa alokasaun ba kategoria gastus inisiu no orsamento rectificativo 2010 hatudu momos katak, gastus barak liu mak sei habokur deit makina do estado duke benefisia ba povu rai doben ini. Iha tabela kraik hatudu mai ita kona-ba diskriminasaun despeza orsamento do estado 2010:

No	Kategoria Despeza	Orsamento Inisiu	Aumentu Despeza	%	Rectificativo	%
1	Salariu e Vensimentu	97,708	1,391	1.4	99,099	11.8
2	Bens e Servisu	210,280	58,470	27.8	268,750	32.1
3	Kapital Minor	29,809	4,682	15.7	34,491	4.1
4	Kapital Dezenvolvimentu	216,808	34,201	15.8	251,009	30
5	Transferensia Publikas	105,391	79,241	75.2	184,632	22
Totalidade Osan		659,996	177,985	27.0	837,981	100

Diskriminasaun hatudu husi despeza correntes (salariu e vencimentu, bens e servisu, kapital minor no transferensia publikas) **hamutuk \$586,972** milhoes de dollar Americanos ka representa 70% kompara ho despeza kapital 30% deit. Tamba liu husi kategoria despeza kapital povu sei hetan impaktu dereitamente tamba sei halo ba dezenvolvimento fisiku.

Dotações ba despeza correntes iha orsamento rectificativo aumenta makaas husi **\$443,19** milhoens de dolar Americanos ba iha **\$586,972** milhoes de dollar Americanos. Orsamento ne'e indika katak despeza non-kapital as liu tiha **despeza kapital (30%)** nebe tuir lolos despeza ne'e mak povu bele benefisia nia impaktu dereitamente husi orsamento jeral estado.



Tamba ne'e, Luta Hamutuk husu ba Governo no Parlamento Nasional hodi halo hadia tabela despeza orsamento rectificativo nebe mak la-indika proporsionalidade dotações nebe vigora iha iha Lei Orsamento no Jestaun Finanseiro artigo 23, paragraf 4 relaciona ho Conteúdo do Orçamento do Estado e Despesas Obrigatórias.

Despeza aumentu iha OR 2010:

No	Orgaun do Estado	OGE Inisiu	OR 2010	Aumentu	%
1	Presidente Republika	4,493	6,641	2,148	0.8
2	Parlamento Nasional	12,000	12,000	0	1.4
3	Premeiro Ministro no Presidente Conselho Ministro	14,019	21,428	7,409	2.6
4	SE Conselho Ministro	3,966	4,597	0.631	0.5
5	SE Juventude no Disporto	4,516	5,206	0.690	0.6
6	SE Recurso Naturais	5,167	8,217	3,050	1.0
7	SE Politica Energetica	6,892	6,905	0.13	0.8
8	SE Formasaun Profesional e Emprego	4,850	10,100	5,250	1.2
9	SE Promusaun Igualdade	0.971	1,046	0.75	0.1
10	Ministerio Defeza no Seguransa	44,954	60,301	15,347	7.2
11	Ministerio Negosios Estranjeiro	14,167	14,167	0	1.7
12	Ministerio Finansas	13,282	32,063	18,781	3.8
13	Dotasaun para todo o Governo	54,275	63,486	9,211	7.6
14	Ministerio Justisa	10,894	11,900	1,006	1.4
15	Ministerio Saude	35,692	37,541	1,849	4.5
16	Ministerio Edukasaun	67,486	70,620	3,134	8.4
17	Ministerio Estatal e Ordenamento Territorio	21,078	53,657	32,579	6.4
18	Ministerio Dezenvolvimento Economia	13,766	14,529	0.763	1.7
19	Ministerio Solidariedade Sosial	69,597	103,747	34,150	12.4
20	Ministerio Infrastruktura	188,341	206,148	17,807	24.6
21	Ministerio Turismo, Comersio no Industria	38,374	56,726	18,352	6.8
22	Ministerio Agrikultura e Pescas	16,398	19,461	3,063	2.3
23	Tribunal	2,577	2,577	0	0.3
24	Procurador Geral da Republica	2,550	4,025	1,475	0.5
25	PDHJ	0.864	0.864	0	0.1
26	RTTL	2,699	3,299	0.600	0.4
27	CNE	4,153	4,153	0	0.5
28	KAK	1,045	1,045	0	0.1
29	Comissaun Funsau Publica (CFP)	0.933	1,536	0.603	0.2
	Totalidade (US\$ milhoes)	659,999	837,985	177,986	100

Tuir tabela OR 2010 ida ne'e, hatudu laiha proporsionalidade iha alokasaun tuir plano prioridades hitu (7) iha 2010 nian laran. Tamba Ministeriu importante balun nia orsamento ki'ik teb-tebes. Nune-mos laiha tabela ida mak hatudu ba ita hotu hodi diskrimina prosentazem alokasaun hodi refleto plano prioridades. Kuaze plano prioridades 7 iha 2010 ho prosentazen menus husi 10%. Ezemplo mak Ministerio Edukasaun (8.4%), Ministerio Agrikultura e Pescas (2.3%), Ministerio Saude (4.5%) nomos Ministerio Justisa (1.4%). Aumentu iha OR ne'e barak liu ba Ministerio nebe mak tuir lolos ladun sai prioridades tamba nia plano barak liu iha item transferensia nian. Ezemplo: Ministerio Dezenvolvimento Economia, nebe nia transferia bo'ot la-halimar hamutuk **\$9,670 milhoes (67%)**.

1. Ministerio Dezenvolvimento Economia: husi montante osan hamutuk \$14,529 milhoes de dollar, aloka ba *transferensias* hamutuk **\$9,670 milhoes (67%)** hodi halo pagamento publikas nebe mak laiha detalhes hodi halo ba saida, fo ba se, oinsa uza nomos nia retorno longo prazu oinsa. Tamba osan liu \$9 milhoes hodi fahe deit, nune mos ami hare'e katak parlamento sei difisil atu halo fiskalizaun ba item ida

ne'e. Tamba-ne'e, Luta Hamutuk husu atu item ida ne'e tau ba iha despeza kapital nian nomos apresenta nia detalhes ba utilizasaun osan ida ne'e.

Tuir Luta Hamutuk nia monitoramento iha Oecusse, Aileu, Lautem, Viqueque, Liquisa, Ermera, Bobonaro, nomos fatin sel-seluk tan hatudu katak, comunidade iha area rurais presiza facilidades baziku urjenti hodi hadia sira nia moris lor-loron. Tamba-ne'e, presiza muda osan mak bo'ot teb-tebes ne'e ba iha kapital desenvolvimento hodi hadia nomos kanaliza bee-mos, eletrisidade nomos hadia estrada rurais.

2. Ministerio Edukasaun (ME): Despeza ME iha OR hamutuk **\$70,620 milhoes** ba iha bens e servisu hamutuk husi \$15,483 milhoes aumenta sae ba 19,628 milhoes (28%) bo'ot liu kompara ho kapital desenvolvimento nebe tun ba iha \$7,535 milhoes (11%). Resultado monitoramentu no peskiza nebe mak Luta Hamutuk hetan hatudu katak ME presiza tau atensaun makaas ba iha infrastrukuras escola, mobiliariu escolar nomos facilidades apredinzajem nebe kuaze iha fatin hotu-hotu kestiona. Ezemplo mak escola filial pre-secundaria no. 1 Fatumasi iha Sub-distrito Bazartete nebe mak nia kondisaun fisiku, mobiliariu o facilidades at teb-tebes. Inklui mos, escola lubun ida iha distrito Dili rasik nomos iha fatin bar-barak iha territoriu tomak. Tamba-ne'e, despeza nebe mak aloka ba iha *bens e servisu* tenke limita no aloka ba iha nesesidades escola nian.

Alokasaun OR iha ME ho prosentajem ki'ik (8.4%) bainhira hare'e ba prioridades governo iha tinan 2010, hatudu momos katak governo liu husi ME seidauk fo atensaun ba importansia edukasaun iha Timor Leste. Nune mos laiha duni kapasidade tamba OR hatudu laiha proporsionalidade iha alokasaun. Tamba **\$60,385 milhoes (86%)** OR mak aloka hodi habokur deit makina ministeriu nian.

*Luta Hamutuk husu ba Parlamento Nasional no governo atu muda item transferencias nian nebe aloka **\$5,847 milhos** nebe mak laiha detalhes hodi halo ba saida hodi tau ba iha despeza kapital hodi nune bele responde preokupasaun comunidade no estudante.*

3. Ministerio Saude (MS): Despeza ba MS aloka barak liu ba iha despeza corrente nian hamutuk **\$31,841 (85%)** kompara ho despeza kapital (15%). Despeza kapital hakuran tiha iha OR husi orsamento inisiu hamutuk \$10,321 milhoes nebe mak tuir lolos hodi hadia Sentro Saude iha distrito 13 tomak. Mudansa nomos inkonsistencia alokasaun ne'e laiha esplikasaun, tambasa mak muda item hirak ne'e. Nebe tuir lolos osan hodi hadia sentru saude iha distrito hotu no iha OR 2010 ignora tiha ona. Signifika katak, MS laiha sensibilidade no la-preokupa ho kondisaun sentro saude iha distrito tomak nebe mak funsionariu saude nomos comunidade sira preokupa hela ho kondisaun actual nebe mak sentru saude iha distrito infrenta.

*Luta Hamutuk ejiji ba Parlamentu Nasional nomos governo hodi tau nafatin item nebe mak eziste iha orsamento inisiu nebe mak sei hadia sentro saude iha distrito tomak ho montante osan hamutuk **\$4,621 milhoes** de dollar Americanos.*

4. Ministerio Turismo, Comersiu no Industria (MTCI): Governo tenke honoin hikas kona-ba politika intervensaun/subsidio ba fos; tamba politika ne'e akontese bainhira iha situasaun emerjensia nomos krize mundial alimentar no afeta mos ba

Timor Leste. Ladun prudente bainhira durante ne'e servisu MTCI nia hanesan fali cooperativa fos nian deit. Politikamente MTCI laiha kapasidade tamba liu tiha tinan hirak ona ministerio nebe la konsege resolve problema aihan iha rai laran no iha dependensia makaas ba importasaun fos. Buat hirak ne'e hatudu iha OR ba MTCI nebe nia despeza alokasaun ba iha fundo seguransa alimentar ho alokasaun inisiu hamutuk \$25,093 milhoes aumenta sae iha OR hamutuk **\$42,593 milhoes**. Mudansa alokasaun sae to'o 59% sein iha esplikasaun detalhos, nomos laiha previzaun kona-ba nesesidades povu ba fos, produsaun rai laran nomos to'o bainhira MTCI hamenus importasaun fos. Kuaze tinan-tinan MTCI hola hela deit fos, no mekanisme distribuisaun nomos folin fos sempre problema nebe difikulta comunidade hodi sosa fos MTCI. Iha tinan 2009 governo aloka osan hamutuk \$55,557 milhoes ba seguransa alimentar (importa fos) maibe povu barak mak defisil atu asesu fos ne'e ho baratu. No ikus mai (tuir relatoriu esekusaun 2009), governo esekuta deit **\$38,240 milhoes** (69%). Esekusaun ida nebe ladun diak tamba tempo neba comunidade barak la hetan fos.

Iha tinan 2008, MTCI hateten katak hola fos hanesan meus intervensaun merkado, tamba-ne'e mak governo mos hetan rendimento husi fa'an fos ne'e. Maibe iha OR ne'e governo hateten katak importasaun fos hanesan subsidio ida. Perguntas mak ne'e, sei subsidio tambasa mak estado bele hetan retornu husi fa'an fos, subsidio karik ba se deit no to'o baihira. Ikus liu mak, oinsa nia relasaun MTCI ho MAP kona-ba produsaun agricola Timor Leste. Nune Ministerio rua ne'e tau konsiderasaun ba iha produsaun local, tamba importasaun nebe sae makaas tinan-tinan sei hamate produsaun agricola rai laran.

Relasaun ho importasaun nomos fa'an fos, Luta Hamutuk husu ba Parlamento Nasional hodi halo investigasaun nomos fiskalizaun urjenti ba hola fos no distribuisaun/fa'an nebe mak comunidade iha distrito to'o agora sei kestiona.

5. Ministerio Administrasaun Estatal no Ordenamento Territoriu (MAEOT): iha despeza transferensias nian MAEOT hodi aloka ba iha Pakote Dezenvolvimento Desentralizasaun (PDD) hamutuk **\$31,356 milhoes (58%)**.

Husu ba Parlamento Nasional nomos governo atu apresenta detalhas PDD ne'e hodi halo ba saida, mekanisme oinsa nomos se mak atu sai beneficiariu. Sei MAEOT labele apresenta, ami hanoin katak orsamento ba PDD diak liu aloka ba iha Programa Dezenvolvimento Lokal (PDL).

6. Ministerio Infrastruktura (MI): hare'e ba alokasaun montante OR ba iha MI hatudu katak governo iha atensaun makaas ba infrastrutura iha rai laran. Ita bele orgulho ho montante osan mak aloka hamutuk **\$206,148 milhoes (24.6%)** hodi hadia estrada, ponte, mota, nomos sel-seluk tan. Iha alokasaun makaas ba iha areia sentro eletrisidade nomos transmisaun linhas hamutuk \$60,000 milhoes; nune mos hodi hola geradoes ba sentro eletrica Comoro (EDTL) hamutuk \$10,000 milhoes.

Iha tinan 2009, governo aloka osan hamutuk \$87,000 milhoes hodi halo konstrusaun ba sentro eletrisidade nebe ikus mai altera tiha \$72,500 ba iha projeto pakote referendum (PPR). Tinan OR 2010 ida ne'e, governo husu fali \$60.000 milhoes ba iha konstrusaun sentro eletrisidade mak hanesan.

Luta Hamutuk husu ba Parlamento Nasional no governo atu iha konsistente iha plano alokasaun nomos esekusaun do orsamentu, tamba comunidade iha distrito barak nomos areia rurais susar teb-tebes hodi asesu ba iha eletrisidade. Mudansa orsamentu prejudika preokupasaun povu ba eletrisidade. Tamba-ne'e, sei governo seidauk iha kapasidade hodi esekuta osan ho diak, diak liu aloka osan tuir kbi'ik mak governo iha nune povu rai ida ne'e bele sente impaktu orsamento ne'e. Laos hodi fakar deit no ikus mai foin mak arepende tiha.

Esekusaun do Orsamento

1. Esekusaun OGE Annual 2009

Tuir tabela esekusaun orsamento geral do estado ano sivil 2009 ho montante \$680.873 milhoes de dollar Americanos hatudu susesu bo'ot, governo atinzi actual pagamento hamutuk \$605.340 milhoes de dollar Americanos (89%). Signifika governo la-konsege esekuta osan hamutuk **\$75.533 (11%)** milhoes de dollar Americanos mak sei fila ba iha konta estado nian.

Problema mak iha livro esekusaun, governo la-apresenta metas nebe mak atinzi ona nomos metas nebe mak seidauk. Relatoriu esekusaun hatudu deit deklarasaun despeza. Parte seluk mak, laiha esplikasaun detailhos mos ba alterasaun nebe mak governo halo iha tinan 2009 nia laran. Iha mudansa lubun ida durante halo esekusaun, problema mak iha livro esekusaun la-hatudu esplikasaun ruma kona-ba tambasa mak halo alterasaun. Projeto PR estrada, ponte no mota hamutuk 56 projeto; PR ba eletrisidade hamutuk 21 projeto nomos projetos fisik seluk iha distrito 13 hamutuk 754 projeto.

Relasionadu ho esekusaun do orsamento estado 2009, Luta Hamutuk hakarak hato'o pontus balun kona-ba susesu esekusaun nebe akontese tamba:

a. Projeto Pakote Referendum (PPR): tuir dadus nebe mak Luta Hamutuk iha nebe hatudu montante orsamento PPR hamutuk **\$73.495** milhoes de dolar Americanos ba projetus hamutuk **831** (excluindo ho projeto emergensia).

Tuir monitoramento nomos observasaun nebe Luta Hamutuk hala'o hatudu kuaze Projeto Pakote Referendum laiha qualidade tamba la-bazeia planeamentu nebe mak klaru. *Tamba-ne'e, husu ba Parlamento Nasional hodi hari'i Komisaun Inkerito Parlamentar tuir Konstituisaun RDTL haruka hodi haktuir prosesu foti desizaun ba PPR (politika), prosesu aprovizionamento, alokasaun osan tuir duni Decrito Lei No. 29/2009 ka lae, nia qualidade nomos implementasaun iha terenu. Tamba ami hare'e katak iha inkonsistensia bainhira lei ne'e implementa nune bele sai hanesan baze ba prosesu balun tuir mai.*

b. Alterasaun despeza: relatoriu esekusaun hatudu katak iha 2009, instituisaun estado halo alterasaun ba despeza lubun ida. Alterasaun signifika katak halo mudansa ba saldo item despeza nian hodi uza ba item seluk. Alterasaun hanesan meus ida hodi demenui despeza seluk mak la-to'o maibe, ami hakarak hateten katak presiza iha esplikasaun eskrita ba alterasaun hirak ne'e. Hodi nune labele hamosu konfuzau iha publiku nomos uzu osan tuir plano mak iha ho konsistente.

2. Esekusaun OGE Trimestre 2010

Bazeia ba relatoriu esekusaun orsamentu estadu I Trimestre tinan sivil 2010, hatudu momos katak rezultadu esekusaun ne'e seidauk maximu, liu-liu esekusaun ba despeza kapital nebe durante fulan tolu nia laran governu la-halo esekusan liu (0%). Tamba-ne'e, Luta Hamutuk sei duvida ho OR nebe ho montante aumentu hamutuk **\$34,201 milhoes** de dollar Americanos ba kategoria Kapital Dezenvolvimentu, Tamba Rezultadu ezekusaun I Trimestre ne'e indika katak, governu liu husi Ministerio Infrastruktura seidauk iha kapasidade atu absorve orsamentu barak.

Luta Hamutuk husu ba Parlamento Nasional no Governo atu tau atensaun makaas ba aumentu ne'e, no ami husu hodi altera aumentu ne'e hodi aloka ba iha estrada rurais nomos bee-mos. Tamba kuaze suco no aldeia barak mak defisil atu asesu ba iha estrada nomos hetan kanalizasaun bee-mos.

Ikus liu, Luta Hamutuk husu ba Parlamento Nasional no Governo hodi fo atensaun makaas ba submisaun ne'e tamba Orsamento Rectificativo 2010 hatudu montante osan nebe mak bo'ot teb-tebes. Nune mos ita hotu espera katak, osan lubun ne'e sei benefisia ba iha povu liu-liu komunidadade iha areia rurais nebe mak sei do'ok husi kondisaun moris diak no qualidade fasilidade publiku nian.

Obrigado wain!

Dili, 15 de Junho de 2010

Mericio Akara

Direitor Luta Hamutuk

Tel: (+670) 7263783